

Un transformacion grandi lo tuma lugar:

Desaroyo di e hotel na San Nicolas ta “e webo di oro” pa e distrito su economia

ORANJESTAD (AAN) – Minister Otmar Oduber, Titular di Infrastructura, Maneho di Medio Ambiente y Desaroyo Teritorial, den conferencia di prensa di gobierno, Diahuebs, a bolbe duna un repaso di loke e compromiso pa desaroya un hotel na San Nicolas ta encera y nifica.

E dignatario a reitera, den su relato tocante e groundbreaking di e construcion di Secrets Baby Beach Resort, cu e combersacionnan di gobierno cu e grupo desaroyador, tabata masha hopi mes, dirigi riba bende e balornan unico cu San Nicolas tin pa por desaroya y forma parti di e industria di turismo di Aruba, y tambe pa e por tin e posicion di salvaguardia e naturaleza y aspectonan di medio ambiente, cu ta asina importante pa gobierno, y percura pa cuida e flora y fauna y tur otro aspecto cu tin di haber cu e naturaleza den e area aki, manera a wordo

comenta varios biaha ora cu tabata tin proyectonan bao diferente gobierno cu kier a desaroya e sector aki di Aruba.


E mandatario a señala cu no ta por nada cu a pone condicionnan grandi y necesario, hunto cu diferente departamento di gobierno, experto y profesionalnan pa percura pa cuida loke tin den e area y pa nos leynan wordo respeta pa loke ta trata diferente especie cu ta proteha, como tambe loke ta accesible den e area aki, un bez cu tin desaroyo den dje.

Minister Otmar Oduber a subraya cu e condicionnan cu a wordo poni no ta facil pa ningun desaroyador ni ningun persona cu kier inverti y haci negoshi pa cual e ta inverti.

Pues, despues di combersacionnan hopi largo, hopi condicion, reunion y encuentronan cu mester a tuma lugar y a base di planificacionnan cu a sosode den pasado, tanto pa loke ta trata e Plan

Sasaki como e plannan ultimo y e maneho di ROP y e bista cu tin riba ROPV, y cu hasta a dicidi pa proteha un area hopi grandi cu a wordo preserva y cuida, pero duna oportunidad den e desaroyo teritorial na San Nicolas, pa un desaroyo economico tambe tuma lugar den local Aruba ta haciendo bon aworaki aki, cu ta su industria di turismo.

Minister Otmar Oduber a expresa su gradicimento na tur persona cu a contribui na e desaroyo aki, indicando cu e impacto pa loke ta nifica e industria hotelero pariba



di nos Isla y pa Aruba en general, ta grandi. E ta algo cu a wordo hinca den un rapport di PricewaterhouseCoopers, unda a midi no solamente kico e efecto di un hotel ta pa e area aki, pero kico tur ta nifica pa tur loke ta bin rond di e hotel y e impulso cu e ta crea. E dignatario a señala cu, manera el a combersa

cu Asociacion di Comerciante di San Nicolas, durante nan ultimo summit, practicamente por papia di e “webo di oro” cu ta wordo encontra pa motibo cu e discusion durante e 40 añanan cu por a crea of busca pa crea un diversificacion economico pa San Nicolas, tabata e hecho cu tur hende ta puntra pakico pone un negoshi na San Nicolas, si no tin hende pa cumpra den e negoshi, y di otro banda tin hende ta bisa cu no ta bin pariba pasobra no tin negoshi pa bishita of cu por bay haci negoshi cerca dje.